



परमात्मा ने दुनिया बनाई – अपण किय्याँ?




ए से कहाणी है जिस मिन्ज दस्सेरा है कि दुनिया किय्याँ बणी थी। परमात्मा ने ए सारी दुनिया ते जि किछ बी इस मिन्ज है, से सब छे दिनां मिन्ज ही बनाई सुट्टेया थिया। पैल्ले धरती मिन्ज निह्यारा ही थिया ते ए खाल्ली थी, ते इस मिन्ज किछ बी नी थिया बणेरा। अपण, पवितर आत्मा पाणी रे उप्पर ही मन्डरांदी रहन्दी थी।



ताँ परमात्मा ने बोल्लेया, “रोसनी होई जाओ”! ते तिस्सी बेल्ले सब जगा रोसनी होई गई। परमात्मा ने दिक्खेया कि ए रोसनी ता बड़ी छैळ है, ते इसेरा नां तिन्हा ने “दिन” / ”भ्याग” पाई दित्तेया। परमात्मा ने रोसनी जो निहारे का बखरा करी दित्तेया, ते निहारे रा तिन्हा ने “रात” नां रखी दित्तेया। परमात्मा ने पैल्ले रोज्जे रोसनी बणाई थी।



दुनिया बनाणे रे दूए रोज्जे, परमात्मा ने बोल्लेया कि अम्बर बणी जाओ ते सच्ची धरती रे
उप्पर अम्बर बणी गया।



तरीये रोज्जे, परमात्मा ने अपने मुंह कने बोली करी ही पाणी कने धरती जो इक दुज्जे का बखरा बखरा करी दितेया। तिन्हा ने धरती रा नां “पृथ्वी” रखेया ते कने पाणी रा नां समुंदर रखी दितेया।



ताँ फिरी परमात्मा ने बोल्लेया, “पृथ्वी पर नेक बनेके, छोटे बड़्डे बुट्टे, फुल्ल फाल्ल ते मती सारियाँ बुट्टियाँ उगी पोन”, ते तिय्याँ ही होई बी गया। परमात्मा ने दिक्खेया कि जे किछ बी तिन्हा ने बणाएरा है, से ता बड़ा भारी छैळ है लगेया करदा, ते से ए सब किछ दिक्खी करी बड़े खुस होई गे।



दुनिया बनाणे रे चोथे रोज्जे, परमात्मा ने अपणे मुंह कने बोल्लेया कि “सूरज”, “चाँद” ते कने “तारे” बणी जान ते से बी बणी गे। परमात्मा ने ए सब इधेरे ताँई बणाए कि रोसनी ते निह्वारे कने अपणे आप ही दिन रात होई जान ते मोसम ते कने साल बीतदे जान, जिय्याँ जे आज्ज कल्ल होया हिन करदे।



पंजमे रोज्जे परमात्मा ने समंदर मिन्ज रहणे वाळे जीव जन्तू बणाए कने सारे चिडू पखेरू बी बणाए। परमात्मा ने दिक्खेया कि ए सब किछ बड़ा छैळ है।



फिरी छेम्मे रोज्जे परमात्मा ने बोल्लेया, “धरती पर नेक बनेके जानवर फैल्ली जान”, ते बिल्कुल इय्याँ ही होई गया जिय्याँ परमात्मा ने बोल्लेया थिया। तिन्हा जानवराँ मिन्ज का किछ जंगली होए, किछ घा खाणे वाळे, किछ बर्फा मिन्ज रैहणे वाळे होई गे। धरती पर इय्याँ मते सारे जानवर होई गे। ए सब से ही जानवर हिन जेडे असां जो आज कल एस धरती पर दिस्दे।

परमात्मा ने दिक्खेया कि ए सब किछ बड़ा छैळ है लगदा।



ताँ परमात्मा ने बोल्लेया, “अवे मणू बनाणा चाहिन्दे जेडे जे दिखणे सुनणे जो मेरे ही साँही होन ते तिन्हा मणुआं जो इस धरती पर ते कने इस पर रहणे वाळे सबनी जानवराँ पर पूरा अधिकार होणा”।



ताँ परमात्मा ने थोड़ी करी मिट्टी लेई, ते तिस कने इक मणू बनाया, कने तिस मिन्ज “साह” (साँसेँ/Breath) पाई दित्ते। इस मणू रा नां “आदम” थिया। परमात्मा ने इक बगीचा बनाया, जिस मिन्ज आदम रेई सको, ते कने तिस जो तिस बगीचे मिन्ज रखेया कि आदम तिस बगीचे री देख भाल बी करदा रेह।



बगीचे रे मन्झाट्टे जणे परमात्मा ने दो खास किस्मे रे बुट्टे लाए तिन्हा मिन्ज का इक “जीआणे वाळा बुट्टा” (जीवन का पेड़/Tree of Life) थिया ते दुज्जा बुट्टा “खरे बुरे री पछियाण करणे वाळा” थिया।

परमात्मा ने आदम जो बोल्लेरा थिया, कि तू इस बगीचे मिन्ज का जिस मरजी बुट्टे का फाळ खाणा चाँगा, से खाई सकदा, अपण जेड़ा जे खरे बुरे री पछियाण करणे वाळा बुट्टा है, तिसेरा फाळ कदी मत खांदा। अगर तू इस बुट्टे रा फाळ खांगा, ता तैं मरी जाणा।



फिरी परमात्मा ने बोल्लेया, “आदम किल्ला रेहन्दा, ए ता खरी गाल्ल नी है”। अपण धरती मिन्ज इदेया कोई बी जानवर नी थिया, जेड़ा जे आदम रे सोग्गी ते तिस कने मिलि जुलि करी रेई सको।



इधरे तौई परमात्मा ने आदम जो घणी निन्दरा मिन्ज सुआई दितेया। फिरी परमात्मा ने आदम री इक पसली लेई ते तिस पसली री इक जनानी बणाई दिती ते तिस जो आदम का लेई आए।



जिस बेल्ले आदम ने तिस जो दिक्खेया, ता से बिलणा लग्गेया, “आखिरकार! ए ता बिल्कुल मेरे ही सांहई है! आदम ने फिरी तेस जनानी रा नां “जनानी” पाणा किजोकी ए ता मणू का ही है बणरी” (woman made from man)। इधेरे ही ताँई इय्याँ हुन्दा, कि इक पुत्तर अपने माँ प्यो जो छड्डी करी अपनी लाडी कने इक होई करी बखरा लगी पौंदा रैहणा।



परमात्मा ने मनु ते जनानी जो अपणे ही साँई बणाया, ते दिक्खेया कि ए सब किछ बड़ा भारी छैळ है। परमात्मा ने तिन्हा जो असीस दिती कने बोल्लेया, “तुम्हारे मते सारे निके निके ते पोतरू पड़पोतरू होई जान ते कने तिन्हा कने सारी धरती भरी जाओ!” ए सब किछ दुनिया बनाणे रे छेम्मे रोज्जे होया थिया।



जिस बेल्ले सतमाँ रोज आया, परमात्मा अपणा काम्म पैल्ले ही मुकाई बैठेरे थिये। इधेरे ताँई परमात्मा ने इस दिन अराम कित्तेया। तिन्हा ने सतमे दिन जो “पवित्तर दिन” मन्नेया, किजोकी इस रोज्जे तिन्हा जो अपणे काम्म का अराम मिलेया थिया। परमात्मा ने इस तरीके कने इस धरती जो ते इस पर जे किछ बी है, से बनाया।